

**Служба священномученику Серафиму Чичагову,
митрополиту Петроградскому, священномученику
Василию Завгороднему, диакону и мученице Анисие
Маслановой**

(11 декабря н.ст.)

На Гóсподи воззва́х: стихіры на 8, глас 2.

Егда благоволением, святе, Божиим/ Служение Царю и отечеству
свершал еси доблественне,/ Добропобедных о наследниче предков-
воинов,/ Яко лев по имени и храбрством явился еси,/ Супостатом страх,
верным же образ,/ Како души не щадети за искренния,/ Сего ради на
грядущия о Дусе подвиги/ Соблюде тя Небесный Царь Иисус -// Бог
полков серафимских.

Егда благословением Кронштадтскаго пастыря/ Зван был еси на
служение священное,/ Зрел еси, честне, в сем мученичество волею,/ Но
обаче верою трепетною,/ Паче же любовию сердца мужественна/ Вдался
еси, яко железо ковачу, -/ Промышлению, мудре, Божественну,/ Имже
устрои ты ко званию высшему Иисус -// Бог избранных на
крестоношение.

Егда, испытуя в горниле скорби/ Злато благородныя души твоя,/
Призва к Себе возлюбленную ти супругу Господь,/ Ты, навыв от юности
Тому прекланяти главу,/ Паче же лобызати десницу Божественную,/
Попечению благому вверив сироты,/ Ангельский избираеши, о
Серафиме, образ,/ Да усвоит ти молитву, яко царицу добродетелей,
Иисус -// Бог лицезримый сердцу чистому.

Егда летописание ти Серафимовы обители,/ Чудне отче, свыше
вверися,/ Ты счастливою сердца памятию,/ Во едино собирал еси
свидетельства истинныя,/ Яже о Божиих чудесех и подвизех иноческих,/
Любовию пламенея ко преподобному,/ Иже и посещением дивным
презельне возрадова тя,/ Да и паки прославлению того послужиши,/
Волею царя, любочестна о святых,/ Да конечно возславит преподобный
Серафим/ Сию двоицу новую от священства и царства,/ В пренебесных

обителех, идеже славится вечно Иисус -// Единый от человеколюбных Троицы.

Стихи́ры свящмч. Василию, глас 1.

Прехва́льне священномучениче Василие,/ ты ни темница изнури́ла
есть,/ ни глад умори́,/ ни озлобле́ния и ра́ны смято́ша,/ во е́же разлучи́ти
тея от любви́ Бо́жия/ и благодарованныя па́сты.// Те́мже Христу́, свя́те,
моли́ся/ дарова́ти Църкви на́шей// мир и ве́лию ми́лость.

Всехва́льне священномучениче Василие,/ от бра́тий по плоти́
страда́ния до кро́ве претерпева́я,/ в себѣ помышля́л еси́,/ я́ко Го́спода
ра́ди умерщвля́еми есмь/ и несть на́ша брань проти́ву плоти́ и кро́ви,/ но
к миродержи́телю тьмы ве́ка сего́./ Те́мже Христу́, свя́те, моли́ся,/
дарова́ти земли́ на́шей// мир и ве́лию ми́лость.

Стихи́ры мч. Анисие, глас 4.

Я́ко дре́вле Мари́ам проро́чица,/ сквозѣ Чермное́ мо́ре проше́дши,/ с
ли́ки и тимпа́ны/ Бо́га прославля́ше,/ ны́не страда́лица Анисие сла́вная,
пучи́ну безбо́жных гоне́ний преплы́вши/ и зе́млю Ру́сскую кровью́
укра́сивши,/ Го́споду побѣдную́ песнь воспева́ет:// сла́вно бо просла́вился.

Я́ко проро́чица А́нна безпло́дная,/ моля́шеся о дарова́нии ча́да/ и
бысть Бо́гом услы́шана,/ та́ко твоѣ воздыха́ние,/ мучени́це Анисие
богоблаже́нная,/ Небе́с дости́гло есть,/ и дарова́ Госпо́дь Църкви Ру́сстей
сы́ны и дще́ри,/ иже посреде́ гоне́ний Христа́ испове́даша:// сла́вно бо
просла́вился.

Слава, глас 2

Егда пресыщенна летами ты, преболезненна, преистязанна,
Повлекоша на конечное судилище безчеловечнии, -/ Серафимом
пачеестественное терпение твое предивно бысть,/ Яко и мужество велие
при устрелянии еже в Бутове,/ Да исполнится славою небошественный
ти, отче, подвиг,/ Да прошение твое к тезоименну преподобному -/ Еже
со оным приснопробытия -/ Любочестне исполнит возлюбленный вам
Иисус,-// Страждущих о любви и истине Бог.

И ныне, Богородичен

Прокимен дне и чтения 3

Притчей чтение.

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и серебра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку, и блажен человек, иже пути моя сохранит. Исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим: яко аз, премудрость, устрой совет, и разум и смысл аз призвах. Мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предомною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научу бо вас истине, да будет о Господе надежда ваша, и исполнитесь Духа.

Премудрости Соломони чтение.

Праведник, аще постигнет скончаться, в покое будет. Осудит же праведник умираяй живуция нечестивыя. Узрят бо кончину праведнаго и не разумеют, что совещаща о нем, яко повержет Господь нечестивыя безгласны ниц и поколеблет их от оснований, и до последняго исчезнут в болезни, и память их погибнет. Приидут бо в помышление согрешений своих ужасни, и обличит их сопровтив беззакония их. Тогда станет в дерзновении мнозе праведник пред лицом оскорбивших его и отмечающих труды его. Видевше же его, смятутся страхом многим и ужаснутся о преславнем спасении его. Рекут бо в себе, кающесе, и в тесноте духа воздохнут и рекут: сей бе, егоже имехом некогда в посмех и в притчу поношения, безумнии, житие его вменихом неистово и кончину его безчестну. Како вменися в сынех Божиих, и во святых жребий его есть? Убо заблудихом от пути истиннаго, и правды свет не

облиста нам, и солнце не возсия нам. Беззаконных исполнихомся стезь и погибели, и ходихом стези непроходны, пути же Господня не разумехом.

Премудрости Соломони чтение.

Праведных души в руке Божией, и не прикоснется их мука. Непщевани быша во очесех безумных умерти, и вменися озлобление исход их. И еже от нас шествие сокрушение, они же суть в мире. Ибо пред лицом человеческим, аще и муку примут, упование их безсмертия исполнено. И в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их: и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему. Яко благодать и милость в преподобных Его, и посещение во избранных Его.

Стихира на литии, глас 6,

Отче долготерпеливе Серафиме,/ Возводиму ти на епископство,/ Слово рекл еси вдохновенное/ О презельных скорбех, богопосланных ти,/ Сироте от осми лет, удрученну людским бездушием,/ В юности вкусившу войну, браней ужасы,/ Потрясением в житии некончаемым,/ Увенчанным вдовством безвременным,/ Тяготу сию приемлет убо о Господе// Сердце твое благостно, благообразна душа.

Стихиры на стиховне, глас 2,

Земле Русская,/ Подвиги в веках прославленная/ Воинов несокрушимых доблестию,-/ Слави тех святонаследника -// Серафима - стратига мучеников

Аз же яко маслина плодовита в дому Божии,/ уповах на милость Божию во век и в век века:

Церковь Русская,/ Кораблю Боговодимый,/ Доле среде бурь тлетворных/ Цельбоносна призови с небес кормчаго -/ Серафима-священнолекаря и мученика.

Исповемся Тебе во век, яко сотворил еси, и терплю имя Твое,/ яко благо пред преподобными Твоими:

Соборе святых русских,/ Преисполнь дарми Божественными,/ Велелепнаго витию-ритора,/ Живописца и певца изряднаго - // Серафима увенчай священномученика

Сла́ва, глас 4:

А́нгели страда́нием вашим дивля́хуся,/ и Це́рковь Небе́сная ра́достно вас прия́т,/ достохва́льне священномучениче Василие и мученице Анисие./ Ны́не же, ру́це ваша к Престо́лу Святы́я Тро́ицы простира́я,/ помина́йте зе́млю Ру́сскую,/ ю́же возлю́били есте,// моля́ о спасе́нии сла́вящих вас благоче́стно.

И ны́не, Богоро́дичен, глас то́йже:

При́зри на моле́ния Твои́х раб, Всенепоро́чная,/ и вся́кия ско́рби изба́ви зе́млю Ру́сскую,/ до́м Твой наре́ченную/ и крове́ми новому́ченик освяще́нную./ Да не постыди́мся, Влады́чице Держа́вная,/ Ты бо еси́ правосла́вных по́мощь,/ ра́дость и покрóв// и спасе́ние душ на́ших.

Ин Богородичен:

В сени си святособравшая/ Агапита и Алипия/ С воином Феодором, с Филаретом мудрым,-// Серафима тем воспой священнотаинника.

Ин Богородичен:

Новый доме Евфрафов,/ Светоносный столпе Бутово,/ От глубин земных до небес сияй,/ Возблистай священную памятью// Серафима солнца Руси новаго.

Тропарь свящмч. Серафиму, глас 4:

Яко единоправен учителем вселенных,/ яко светоч Руси, преисполнен дивных даров,/ преподобных возлюбленне и праведных,/ яко веры исповедник явился еси,/ злобу мира отразивый доблественне,/ - Серафиме стратиже мучеников,// моли о душах наших.

Тропа́рь свящмч. Василию и мч. Анисие, глас 3:

Це́ркве Ру́сския столпи непоколеби́мии,/ благоче́стия пра́вило,/ жити́я ева́нгельскаго о́бразы,/ священному́чениче Василие и

**мученице Анисие,/ Христá rádи пострадáвшийи дáже до крóве,/ Егóже
молíte усérдно,/ я́ко Нача́льника и Соверши́теля спасéния,/ Русь
Святúю утверди́ти в Правосла́вии// до сконча́ния ве́ка.**

НА УТРЕНИ

*На Бог Господь: тропáрь свящмч. Серафима двáжды. Сла́ва
тропарь свящмч. Василия и мч. Анисии, и ны́не: Богородичен гласа.*

По стихоло́гии седа́лен, глас 2:

Иллариону священномученику ризу свою светлейшую погребения ради трепетом и любовью даровал еси, Серафиме, ныне же, о страдальцы-пастырие, Агнцу предстоите в Кровию Его убеленных ризах, паче солнца на небеси блистающих.

Слава:

Сквозé огонь мучéния, я́ко свидéтели вёрнии, прошли есте,/ блажéннии Василие и Анисие,/ сего́ rádи с ли́ки святýх земл́и Рýсския/ в Небéснем Отéчестве торжествúете./ Помозíte и нам бýти вёрным Христú и спаст́ися душáм нáшим.

И ны́не:

В ризах позлащенных одеяна и преукрашенна, предста одесную Тебе, Царю, Державная Владычица, о Руси Святией умоляющи с новомученики.

По полиелее седален:

Страшен пагубы служителем и на одре болезни был еси, старче Божий, мнившим тя, героя великаго сокрушити духа. Где ти, аде, победа, - восклицаеши, Серафиме со Исаиею ныне и Златоустым: Воскресе Христос и с Ним новомученицы.

Слава:

Дóблий страдáльче и служíteлю Та́ин Бóжих,/ священномúчениче Василие,/ Цérкве Рýсския похвалó и утверждéние,/ ны́не, прáзднующе твою́ пáмять,/ Бóгу, просла́вльшему тя, благодарственно вопиём:/ сла́ва Дáвшему ти крéпость во страдáниях,/ сла́ва Венчáвшему тя,/ сла́ва Спасáющему нас тво́ими молítвами.

И ныне:

Внутри Тебе Самой, богомудрствует священномученик Серафим, осталася слава Твоя, Богомати, на земли, всем же неприкосновенною соделася - и Сыну Твоему Божественному, сего ради язык наш, поющ Тебе, умолкает.

Прокимен, глас 4: Тебе ради, Господи, умерщвляеми есмы весь день. Стих: Вменихомся якоже овцы закления.

Евангелие от Иоанна, зачало 36

Слава/ молитвами священномучеников Серафима, Василия и мученицы Анисии,/ Милостиве.. И ныне/ молитвами Богородицы.. Помилуй... *и стихира, глас 6*

Святым иже суть на Руси святей,/ новомучеником преславным,/ удиви Господь хотение Свое,/ еже Церковь Русскую возродити/ дерзновенным сих ходатайством,/ сего ради Серафиму, велию стратигу сих,/ подвигом пламенным прославлену,/ паки и о всей Руси умоляюще, возопиим:// радуйся солнце новое земли Русския!

Канон, глас 4

Песнь 1

Ирмос: Моря чермную пучину невлажными стопами древний пешешествовав Израиль, крестобразными Моисеовыма руками Амаликову силу в пустыни победил есть.

Священномучениче Серафиме, моли Бога о нас.

Не остави суетою отягченного мя, слово воспети тя ниспосли, ко вниманию вышнему, отче Серафиме, настави.

Священномучениче Серафиме, моли Бога о нас.

Еже в славнем семействе воинством рождество твое, еже со преподобными и святыми пастыри твое житие, с мучениками же память твоя, Серафиме.

Священномучениче Василие, моли Бога о нас.

Во́ли Бо́жией послушли́в быв,/ священства дар прия́л еси́,
священномучениче Василие,/ и, за Христа́ да́же до сме́рти пострада́в,
ве́рный сын Це́ркве яви́лся еси́.

Священномучениче Василие, моли Бога о нас.

Изгна́ние и разлуче́ние с па́ствою твоёю му́жественне претерпе́л еси́,
священномучениче Василие,/ но ничто́же возмо́же разлучи́ти тя от
любве́ Бо́жия.

Святая мученице Анисие, моли Бога о нас.

Же́ну до́блю обрето́хом в землі на́шей,/ пра́ведным жити́ем и
страда́ньми Бо́гу угоди́вшую,/ ю́же по досто́янию воспева́ем.

Святая мученице Анисие, моли Бога о нас.

Еле́ем благоче́стия се́рдце твоё испо́лнивши, мученице Анисие,/
бу́рю безбо́жия во оте́честве на́шем во дни гоне́ний прешла́ еси́,/ Христу́
Подвигополо́жнику сла́ву возсыла́ющи.

Катавасия: Христос раждается:

Песнь 3

*Ирмос: Лук сильных изнеможе, и немощствующии препоясашася
силою, сего ради утвердися в Господе сердце мое.*

Священномучениче Серафиме, моли Бога о нас.

Вся мирская, аще и пред человеки достойна суть, яко суету
вменяеши, пастырю послушлив Кронштадтскому, присным тому
являеши ся - по духу любви пастырския.

Священномучениче Серафиме, моли Бога о нас.

Иже нас ради распныйся, се и ты к сораспятию зовет, крест
вдовства на рамена ты возлагает, яко вся ведый - и терпение и любовь
твою.

Священномучениче Василие, моли Бога о нас.

Егда прииде испытание веры твоея, священномучениче Василие,/ страдание за Христа, яко благодатный дар, приял еси/ и кровию твоею Русскую землю обогрел еси.

Священномучениче Василие, моли Бога о нас.

Егда прииде гонение от безбожных,/ столп непоколебим Русския Церкви явился еси, священномучениче Василие,/ святых, яко ближних родник, в помощь призывая,/ с нимиже купно ныне прославляеши.

Святая мученице Анисие, моли Бога о нас.

Оружием правды крепость диаволу низложила еси/ и Церкви Русския гонители безбожные победила еси,/ мученице Христова Анисие.

Святая мученице Анисие, моли Бога о нас.

Видяще ты Ангелы на судищи беззаконнем, Христа исповедающе,/ укрепляху во страданиях/ и яко доблюю мученицу прославляху.

Кондак свящмч. Василию и мч. Анисие, глас 2:

Восхвалим, вернии,/ изрядного во священниках Василия/ и славную в мучениках Анисию,/ Православия поборников и благочестия ревнителей,/ земли Русския красное прозябение,/ иже страданием Небесé достиже/ и тамо тепле молят Христа Бóга// спастися душам нашим.

Икос:

Красуйся и ликуй, Церковь Русская,/ яко благоплодная лоза славных страдальцев израстившая,/ добропобедным мучением сердца верных укрепивших,/ заповеди Господни исполнивших и присто евангельски учивших:/ приидите, чада, послушайте мене,/ не убойтесь от убивающих тело, души же не могущих убить,/ убойтесь же паче могущаго душу и тело погубить в геенне./ Темже, священномучениче Василие и мученице Анисие, молитесь Христа Бóга спастися душам нашим.

Седален Серафиму, глас 2:

Послушания святого, отче, правило, ни шага стопы не дерзал еси вне благословения Иоаннова, предстани убо за ны, сего печальника о наследниче, архипастырю милостиве Серафиме.

Слава, (Василию и Анисие)

Завёты исповёдников и священномучеников Христóвых восприёмшии,/ дýши ваша за вёру Правослáвную положи́ли есте, свѣтии,/ ёюже утвержда́ется землѣ Рýсская./ Сего́ ра́ди моли́тесь, священномучениче Василие и мученице Анисие,/ любóвию чтúщим вас вёрным Христу́ до конца́ бýти.

И ныне, глас 2:

Послушание исполнити убо Евино, се Дева приблизися в Вифлеем, да новому явится Адаму помощницей, да спасение печалованием Тоя улучим.

Песнь 4

Ирмос: Вознесена Тя видевшие Церковь на Кресте Солнце праведное, ста в чине своем, достойно взывающе: слава силе Твоей, Господи.

Священномучениче Серафиме, моли Бога о нас.

Труд одинокий подъемлеши, отче, да прославится на земли велий заступник Руси Серафим, - труд сладостный ради зримаго того покрова, скорбный же, увы, ради хладного сильных мира нечувствия серафическия того святости.

Священномучениче Серафиме, моли Бога о нас.

Весь, отче, вдался еси подвигу, иже ти изволением царским вверися, во еже преподобнаго Серафима прославить, во еже святостию того жития и молитвою - людие просветятся, утвердятся вера, воспламенится ко Христу любовь.

Священномучениче Василие, моли Бога о нас.

Да не дерзают языцы рещи: где есть Бог ваш?/ Кровь бо новомучеников от земли нашей вопиет:/ Господи, Господь наш, яко чудно имя Твое по всей Русстей земли.

Священномучениче Василие, моли Бога о нас.

Имже образом желает елень на источники водные,/ сие ты, страстотерпче Василие, к животоносным страданиям за Христа притекл еси,/ имже присно священо обновляется лице земли Русския.

Святая мученице Анисие, моли Бога о нас.

Любовию Христовою укрепляема, мученице Анисие,/ немощь естества женскаго превозмогла еси/ и мужественно на подвиги устремилася еси.

Святая мученице Анисие, моли Бога о нас.

Исповедуящи Бога небойзненно,/ образ терпения верным показала еси/ и мучителей посрамила еси./ Темже ты вси, славная, величаем.

Песнь 5

Ирмос: Ты, Господи мой, Свет в мир пришел еси, Свет святой, обращающий из мрачна неведения верою воспевающая Тя.

Священномучениче Серафиме, моли Бога о нас.

Яко от небесных доброт лицезрения открывается ти, отче, живописания дар, во свидетельство о Христе - Свете и Лепоте и Жизни истинней.

Священномучениче Серафиме, моли Бога о нас.

Не умолкал еси, отче, сладкий твой глас, песнопоя людям о святей любви Христовей, в нейже сомнения несть, яко ради ея живем и движемся и есмы.

Священномучениче Василие, моли Бога о нас.

Яко луч Солнца Правды явился еси, священномучениче Василие,/ и страданиями твоими мглу безбожия над Отечеством нашим развеял еси.

Священномучениче Василие, моли Бога о нас.

Егда безбо́жнии тща́хуся сокры́ти тя в темни́це, священномучениче Василие,/ Госпо́дь яви́ тя испове́дника Своего́ всем концём земли́ Ру́сския.

Святая мученице Анисие, моли Бога о нас.

Ве́ры свети́льник не угаси́вши,/ но́щь безбо́жия в земли́ на́шей претекла́ еси́/ и нача́льников тьмы посрами́ла еси́, мученице прехва́льная.

Святая мученице Анисие, моли Бога о нас.

Еле́ем благоче́стия ду́шу твою́ напитала́ еси́ богáтно, святáя Анисие,/ и ны́не пребыва́еши в со́нме святы́х Це́ркве Ру́сския.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися ради милости от ребр Твоих истекшею кровию.

Священномучениче Серафиме, моли Бога о нас.

Юже предзрел еси скорбь, древний приим Кананита жребий, та и сrete ядом тя клеветы, паки же ненавидением злых, горьким изгнанием печатлея зачало новаго ти, Серафиме, подвига.

Священномучениче Серафиме, моли Бога о нас.

Щедростию души пречуткия, отче, заступал еси невинныя, враждующия умиряя, горькою разделенных смутю к покаянию воздвизал еси жертвенным образом, еже во Орле и Бессарабии служения твоего.

Священномучениче Василие, моли Бога о нас.

Воспри́им меч духо́вный, и́же есть глаго́л Бо́жий,/ безбо́жных ко́зни сокруши́л еси́, священномучениче Василие,/ и вся разжже́нныя стрéлы лука́ваго угаси́л еси́ щито́м ве́ры Правосла́вныя.

Священномучениче Василие, моли Бога о нас.

Во святѣтелех [или: священницех] благочестно пожѣв и мучѣния
путь терпѣливо воспрѣим,/ сугубую мзду на Небесѣх обрѣл еси,
священномучениче Василие,/ идеже евангельски присно радуешься и
веселишися.

Святая мученице Анисие, моли Бога о нас.

Ангели святѣи удивляхуся,/ како чашу страданий, от руки
Христовой приѣмши, мученице Анисие честная,/ мужески испила еси.

Святая мученице Анисие, моли Бога о нас.

Терпѣнием смиренно укрепившись,/ страданиями Христа ради
нечестивыя победила еси, мученице славная,/ и Церковь Русскую
возвеселила еси.

Кондак свящмч. Серафиму, глас 2:

**Твердаго и боговещаннаго исповедника веры, жизни
церковныя мудраго устроителя, преподобным Серафимом
возхваленнаго, архиерея преиспытанна и пламенна мученика, славу
Руси Серафима новаго, вернии, любовьию похвалим вси.**

Икос:

Златоустовою возпламенившись ревностию, паки Григориево
тайнозрение явль, о духом велие Серафиме, Василиеву твердость
управлением церковным наследуя, Серафима преподобнаго воздыхание
о Руси притяжал еси, паки и пастырю Кронштадтскому горением
непрестанным духа уподобился еси, предивне отче. Над всем же сим
мученический ти сияет венец. Слово изнемогает, но любовьию дух
зовет: славнаго Серафима да похвалим вси.

Песнь 7

*Ирмос: В пеци авраамстии отроцы персидстей любовьию
благочестия паче, нежели пламенем опаляеми взываху: благословен еси в
храме славы Твоея, Господи.*

Священномучениче Серафиме, моли Бога о нас.

Руси, смутою пораженною, се гонения прелютя на Церковь воздвизаются, се и старец-архиерей от пределов своих изгнан - из Твери первее, из Варшавы пресмутныя, даже до града Архангелова многоболезненный досязает Серафим.

Священномучениче Серафиме, моли Бога о нас.

Егда, исповедниче и святителю, заточении истязуем, паки и сосыланием удручен, вся терпети конечно уготовился еси, Серафиме, но се, заступлением Патриарха-исповедника во своя возвращаешься.

Священномучениче Василие, моли Бога о нас.

Яко трие отроцы, в пещи вавилонстей пламенем объятии, молитвою не старяху,/ тако ты, священномучениче Василие, во огни мучений благодатию веру сохранил еси./ Сего ради ныне с новомученики Российскими ликуешь:/ благословен еси, Боже отцев земли наша.

Священномучениче Василие, моли Бога о нас.

Якоже древле отроцы, в пещи неопалении, златому истукану не поклонися,/ тако же и ты, священномучениче Василие, огнем мучений неопалемь,/ безбожие небоязненно обличал еси, взывая с новомученики Российскими:/ благословен еси, Боже отцев земли наша.

Святая мученице Анисие, моли Бога о нас.

Облкшись в броню правды и шлем упования спасения восприемши, мученице достохвальная,/ щитом веры православныя разжженные стрелы лукаваго угасила еси.

Святая мученице Анисие, моли Бога о нас.

Яко огнем Божественным, мученическими кровьми твоими, мученице Анисие,/ терния богохульная и плевелы неверия в земли нашей попалила еси.

Песнь 8

Ирмос: На Кресте плотию пригвожденнаго и показавшаго нам оружие во спасение, отроцы, превозносите Христа Бога нашего во веки.

Священномучениче Серафиме, моли Бога о нас.

Что истязания ваша ми болезнями преистязанну, емшим его беззаконным Серафим вопиет, что суды ваша имущу на суд отъити - к осужденну мя ради Христу, неумытну Отцу, очищающу Духу.

Священномучениче Серафиме, моли Бога о нас.

Еже жити Христос ти бысть, еже умерети - яве Отча благоволения приобретение во веки, се луною в нощи осиявает тя нареченная смерть - упованием, Серафиме, Духа.

Священномучениче Василие, моли Бога о нас.

Землю Русскую, безбожными гонении нещадно жегомую,/ слезами и кровью твоими напоил еси, священномучениче Василие,/ сего ради плоды веры, чада церковная, возрастил еси.

Священномучениче Василие, моли Бога о нас.

Злобы мучителей не убоялся еси,/ огнем любви Божественных твоя препобедив,/ темже благодать молиться о нас стяжал еси, священномучениче Василие, достохвальне.

Святая мученице Анисие, моли Бога о нас.

Пещь огненная не опали три отроки в Вавилоне иногда,/ тако и тебе, мученице Анисие,/ горнило испытаний не возможе поколебати, в терпении поющую:/ возносите Господа во веки.

Святая мученице Анисие, моли Бога о нас.

Агница нескверная, мученица Анисие,/ яко жертва непорочная в дар Богу принесется./ Тоя молитвами, Долготерпеливе,/ сподоби нас возносить Тя во веки.

Песнь 9

Ирмос: Сотвори державу мыслию Своею низложи бо сильныя со престолы вознесе смиренныя Бог Израилев. В нихже посети нас Восток с высоты и направил ны есть на путь мира.

Священномучениче Серафиме, моли Бога о нас.

Егда внуцы святых о священной тех озаботятся памяти, егда новаго Иоанна-старца исполнят благословение, се и нам от небесных, отче, трапезы крупичицы оставятся, се труды твоя необозримыя знаеми днесь, се молитвы твоя воздвизают ны.

Священномучениче Серафиме, моли Бога о нас.

Радуются воины, Серафиме, верныя, с нимиже и лекари, отче, и певцы Божественныя с живописцы, зовуще ти: ты наша похвала, святе, и укрепление.

Священномучениче Василие, моли Бога о нас.

Рука́ми беззако́нных уби́ен,/ же́ртва благоприя́тная и во́льное заколе́ние Бо́гу прине́слся еси́, свя́тче Бо́жий Василие./ Тем благода́рне па́мять твою́ почита́ем.

Священномучениче Василие, моли Бога о нас.

Госпо́дь, исполня́я смотре́ние Своё о Це́ркви Ру́сстей,/ засту́пника тя, священномучениче Василие, соде́ла./ Те́мже моли́ся Ему́, во благоче́стии нам пребыва́ти и спасти́ся душа́м на́шим.

Святая мученице Анисие, моли Бога о нас.

Есте́ство немощно́е си́лою Бо́жиею укрепивши,/ к соверше́нным подвиго́м устремі́лася еси́/ и мужему́дренне вене́ц мученический кровью́ твоими́ стяжа́ла еси́, Анисие всечестна́я.

Святая мученице Анисие, моли Бога о нас.

Ты, добропобе́дная мученице Анисие, Крест Христо́в, я́ко всеору́жие, восприе́мши,/ до́блественне страда́ния претерпе́ла еси́/ и ко́знем диа́вольским противоста́ти возмогла́ еси́./ Те́мже ты вси по досто́янию велича́ем.

Светилен

Просветил вы есть/ миру Светом нарекийся,/ да истинно светоявившии, Серафиме огненне и Василие блаженне,/ любовь Того пресветлую/ - и кистию благословенною,/ и ясным житием, //и светозарным мученичеством.

Слава

Мученица Твоя, Господи, Анисие,/ яко мудрая дева, светильник
душъ своея елеем украсивши,/ во след Тебѣ устремися/ и, Чертога
Небеснаго достигши,/ Света Невечернаго лицезрѣти сподобися./ Еяже
молитвами, Светодавче, и нас светом Твоим озари/ и на путь истинный
направи.

И ныне

Света превечна прятилище,/ Дево Мати Господня,/ просвети рабы
Твоя.

На хвалитех стихиры свящмч. Серафиму, глас 8:

Отче Серафиме благообразне,/ Еще прежде ти обета иноческа/
Явися присным образ яко ангельский твой:/ Се привлекл еси своих си
шествовати по Христе,/ Се бо дщери ти и внука следуют о Господе
твоим стопам,/ Се и именем твоем нарицаются единым серафимским,/ Да
явишия, чудне отче, похвалою и надеждою тем,/ Да умолиши Христа о
сродных ти по плоти и духу,/ Да во веки возгласят любочестну песнь о
тебе:// Сей от рода нашего есть.

В славней, Серафиме отче, памяти твоей,/ Единятся две столицы
русския:/ Читит Петра верховнаго сугубо ты град,/ Рождество хваля и
архипастырство,/ Читит первопрестольная излишше/ Ради первых
подвигов священнических,/ Наипаче же о страдании в Бутове,/ Единятся
убо zde и тамо/ Новодевичии ти присныя обители,/ Внукою игуменией
взывая о тебе:// Сей от рода нашего есть.

Стихиры свящмч. Василию, глас 4.

Дал еси знамение/ земли Русстей, Господи,/ священномученика,
угодника Твоего, Василие,/ яко да тем умолен бывая,/ отвратиши
праведный Твой гнев,/ и не погибнет святая/ и боголюбивая Русь//
предстательством новаго страстотерпца.

Жертву хваления/ присно Господеви принося,/ священномучениче
Василие,/ в конец самого себе/ в жертву живу и святу,/ благоугодну и
совершенну представил еси,/ темже ти верно вопием:/ благоприятны
сотвори молитвы наша// о благостоянии Церкви Русския.

Стихѣры мч. Анисие, глас 1.

Небѣсных чинѡв сопричастница/ и земли Рѹсскія крѣпкое
предстательство,/ мѹченица Христова Анисие/ ликѹет ныне в сонме
новомѹчеников,/ воздаяние вѣчное приѣмши,// и мо́лится о душа́х на́ших.

Небѣснаго Иерусали́ма избрѣнница/ и Цѣркве Рѹсскія дѡброе
украшѣние,/ крѡткая страсотѣрпица Анисие/ прославляѣет Бо́га во вѣки,/
хвалѹ Тому́ прѣсно возсыла́ющи,// и мо́лится о душа́х на́ших.

Слава, глас 8

Отче святолюбезне Серафиме,/ Славы о ревнителю великаго
Саровскаго отца,/ Трепетною рукою описавый/ Богородицы тому
Пречистыя явление:/ Возгласи бо Славнейшая серафим апостолом/ О
блаженном Божиим угоднике/ Слово, еже и о тебе исполньшееся,/ От
святых небес ти ныне возглашаемое,/ И от русскія земли доле
вторимое:// Сей от рода нашего есть.

И ныне, глас и подобен тойже:

О преславнаго чудесе:/ Небеси и земли Царица/ От святых
сродников наших умоляема,/ До ныне землю Русскую покрывает/ И
Лица Своего изображеньми милостивно обогащает:/ О, Владычице
Державная,/ Не престани и на будущее время/ Во утверждении на Руси
православия - // Милости и чудеса изливати до века. Аминь.

На Литургѣи

Прокѣмен, глас 7:

Тебѣ ра́ди, Го́споди,/ умерщвляеми есмѣ весь день. *Стих:* Вмени́-
хомся, ꙗкоже ѡвцы заколѣния.

Апѡстол к Рѣмляном, зачѣло 99

Аллилуѣа, глас 4: Воззва́ша пра́веднии, и Госпо́дь услы́ша/ их, и от всех
скорбе́й их изба́ви их. *Стих:* Мно́ги ско́рби пра́ведным,/ и от всех их из-
ба́вит я Госпо́дь.

Евангелие от Иоанна, зачало 52

Молитва священномученику митрополиту Серафиму (Чичагову)

«О, Боголюбезне Серафиме, велий во святителех и славный в мученицех! Пламенное восхождение твое лицезряще во обители горния, недоумеем, како благохвалити тя, паче же ти возследовати, дивный отче. Вемы бо воина ты предобра, храбрством изрядна и во бранех неодолима. Вемы ты и врача благодатна, в терпении неколеблема и во искусстве преизящна. Ты и живописания даром Церкви послужил еси и сладкопения талант Господеви принесл еси. Паче же, пастырю благий, аще и отрелся еси суеты мира, обаче вся тяготы и скорби того вмещал еси в пространное твое сердце. Не довлеет лета повествовати нам, паче же уразумети ленистым умом непрестанныя ти труды по обителей святых летописанию, Серафима преподобнаго прославлению, жизни устроению церковней, разделений горьких врачеванию. Паки и в изгнаниях и заточениях образ веледущия и смирения крайняго светоявил еси, архиерею Божий. Над сим же всем солнцесияет мученический ти венец. Вся убо превозмогл еси о укрепляющем тя Христе. Сего ради в памяти твоей единяемся и усердно просим: не остави нашей худости, укрепи ны о Господе, еже заповеди Его непорочно хранить, еже Церковь святую от соблазн избавити вражиих, еже горняя нам мудрствовать, греховных же отступати и суетных. Се бо и дерзновение превелие, еже стяжал еси пред престолом Божиим, вемы, пресвятой наш отче. Сим утешаемся и молитвенному твоему заступлению себе о Господе предаем ныне и присно и во веки веков. Аминь.»

Молитва священномученику Василию (Завгороднему), диакону

О, избранныче и угодниче Христов, священномучениче Василие, Церкви Русския столпе непоколебимый, земли нашае благое прозябение и красный плод, сродников твоих предстателю и наставниче! Ты во время гонения безбожнаго от сокровищницы души твоее спасительное исповедание Православныя веры изнесл еси, и людем верным пастырь добрый явился еси, душу твою за Христа и Его овцы полагая и лютыя волки далече отгоняя. Ныне убо призри на нас, недостойных чад твоих, умиленною душею и сокрушенным сердцем тя призывающих. Умоли Господа Бога, да простит согрешения наша и избавит от адовых уз и

вѣчнаго мучѣнія. Утверди нас в вѣре святѣй, научи нас всегда творити волю Божію и хранити заповѣди церковныя. Буди пастырем нашим правило вѣры, воином вождь духовный, болящим врач изрядный, печальным утѣшитель, гонимым заступник, юным наставник, всем же благосердый отец и теплый молитвенник, яко да молитвами твоими соблюдѣтся в Православии Святая Русь и непрестанно славится в ней имя Пресвятыя Троицы, Отца, и Сына, и Святаго Духа, во вѣки веков. Аминь.

Молитва мученице Анисии (Маслановой)

О, доблественная страстотерпице Христова Анисія, земли нашей доброе прозябаніе, Церкви Русския избранная дщи! Кто не удивится силе Божіею, в немощи твоѣй совершившейся? Ты бо, мужески враги видимыя и невидимыя низложивши, заточенія и многія муки Христа ради претерпѣла еси и Царствие Небесное наслѣдовала еси. Темже ты, яко благоую и верную рабу Господню, достойно почитающе, прилежно молим: моли о нас Всещедраго Бога, да дарует Церкви Россійстей благостояніе, Отечеству нашему мир, людем во благочестии преспеяніе, в скорбѣх утѣшеніе, в обстояніих помощь и заступленіе, да благодатию Божіею и твоим теплым предстательством земное жителство пройдем и Царствія Небеснаго достигнем, идеже вкупе с тобою сподобимся прославляти дивнаго во святых Своих Бога нашего, Отца и Сына и Святаго Духа во вѣки веков. Аминь.